

दिनांक 21.11.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रदेश रा सात विधानसभा हलकां मांय व्ह्या उपचुनाव मांय पड्या वोटां री गिणती री तैयारियां पूरी- गिणती 23 नवम्बर ने संवारे 8 बज्यां ऊं ।
- राज्य रा 15 ऊं बत्ता खास शहरां मांय एक्यूआई 200 ने पार कीनो-टोंक मांय हवा घणी खराब व्ही ।
- विद्यार्थियां मांय नवाचार ने बधावो देवण सारु केन्द्र सरकार री नुवी पहल ।
- प्रदेश मांय तापमान मांय और गिरावट सागे ठण्ड रो असर बध्यो- फतेहपुर मांय सब ऊं कम 6 दशमलव 7 डिग्री सेल्सियस तापमान दर्ज करी ज्यो ।

000

राज्य रा सात विधानसभा हलकां झुंझुनू, रामगढ़, दौसा, देवली-उनियारा, खीवसर, सलूमबर और चौरासी मांय उपचुनाव सारु पड्या वोटां री गिणती 23 नवम्बर ने करी जावेला । मुख्य निर्वाचन अधिकारी नवीन महाजन बतायो के वोटां री गिणती री जरूरी तैयारियां पूरी कर लीरीजी है । संवारे आठ बज्यां सारु व्हेवण वाळी गिणती सारु 98 टेबल माथे 141 राउंड मांय गिणती करी जावेला । सब ऊं पैली पोस्टल बैलेट रे मार्फत डाली ज्या वोटां री गिणती करी जावेला, ज्यीं सारु 39 टेबल लगायी जावेला । गिणती री ठोड़ां सीसीटीवी कवरेज अर वीडियोग्राफी री व्यवस्था करीजी है । मीडिया सेंटर मांय मोटी टी.वी. स्क्रीन माथे मतगणना रा रुझान अर नतीजां री जाणकारी दी जावेला । ई सागे ई मुख्य निर्वाचन अधिकारी रा दफ्तर री वेबसाइट अर निर्वाचन आयोग रा मोबाइल एप 'वोटर हेल्पलाइन' माथे ई गिणती रा रुझान अर नतीजां री जाणकारी करी जा सकेला । टोंक जिला रा देवली-उनियारा विधानसभा हलका मांय वोटां री गिणती री तैयारियां रो जायजो लेवण सारु जिला निर्वाचन अधिकारी डॉ. सौम्या झा राजकीय पी.जी. कॉलेज रो दौरो कीनो । वे न्यारी-न्यारी व्यवस्थावां रो जायजो ले र अहलकारां ने जरूरी हुकम दीना ।

000

पारो उत्तरण सागे हवा मांय गंदगी रो लेवल ई बधतो जा रह्यो है । राज्य रा 15 ऊं बत्ता खास शहरां मांय हवा री गुणवत्ता खराब मिली । केंद्रीय प्रदूषण नियंत्रण मंडल री ओर ऊं आज जारी रपट रे मुजब प्रदेश रा केई शहरां मांय वायु गुणवत्ता सूचकांक-एक्यूआई 200 ऊं बत्तो मापी ज्यो । टोंक मांय सब ऊं ऊंचो औसत एक्यूआई 333 दर्ज करी ज्यो । भीलवाड़ा मांय ई वायु गुणवत्ता सूचकांक 291 दर्ज करी ज्यो । राजधानी जयपुर मांय 274, चूरू मांय 265, झालावाड़ मांय 262 अर भिवाड़ी मांय एक्यूआई 261 मापी ज्यो । बारां, बीकानेर, बूंदी, चित्तौड़गढ़, हनुमानगढ़, कोटा, नागौर, सवाईमाधोपुर अर सीकर मांय ई हवा मांय गंदगी रो लेवल बत्तो रह्यो । ई बीचे बारां जिला रा सकतपुर मांय गैर कानूनी तौर ऊं पराली बाळबा रा आरोप मांय 2 किसानां रे खिलाफ मुकदमो दर्ज कर र वां ने आगे पराली नी बाळबा सारु पाबंद करी ज्या ।

000

राज्यपाल हरिभाऊ बागडे नौजवानां ऊं 'विकसित भारत' बणावण सारू लगातार काम करण बाबतू कह्यो है। वे आज महाराष्ट्र रा संभाजी नगर मांय राख्थी ज्या एक कार्यक्रम मांय बोल रह्या हा। राज्यपाल कह्यो के लगातार मेहनत करण वाळां ने ई कामयाबी मिले है। श्री बागडे कह्यो के संस्कृति रो मतलब ही बदलाव री सोच ले र चालणो व्हे है। राज्यपाल कह्यो के भारत री संस्कृति मांय बदलाव ने सागे ले र चालण रो बूतो है।

000

उपमुख्यमंत्री दिया कुमारी आज कोटपुतली-बहरोड़ जिला रा पाथरेड़ी गांव मांय कृषि कॉलेज जनता ने सूंप्यो। ई मौके वे कह्यो के राज्य सरकार खेतीबाड़ी अर काश्तकारां रा भला सारू न्यारी-न्यारी योजनावां बणा र काम कर रही है। वे कह्यो के ओ कॉलेज खुल जावण ऊं ई हलका रा विद्यार्थियां अर किसानां ने फायदो मिलेला। राइजिंग राजस्थान इनवेस्टमेन्ट समिट रो जिक् करता थकां दिया कुमारी कह्यो के प्रदेश मांय ई रा तैत हाल ताई 25 लाख करोड़ रुपया रा करार करी ज्या है। उपमुख्यमंत्री कह्यो के सरकार बेगी ई ट्यूरिज्म यूनिट पॉलिसी लावेला। जळसा मांय जयपुर ग्रामीण संसदीय हलका रा सांसद राजेंद्र सिंह समेत जनता रा केई नुमाइन्दा मौजूद हा।

000

केंद्रीय संस्कृति अर पर्यटन मंत्री गजेंद्र सिंह शेखावत रो काल नई दिल्ली मांय साल 2022 अर 2023 सारू उस्ताद बिस्मिल्लाह खां युवा पुरस्कार देवण रो कार्यक्रम है। कुल 82 नौजवान कलाकारां ने ओ ईनाम दे र नवाजा जावेला। राजस्थान ऊं नामी भपंग वादक यूसुफ खान ने ई ईनाम ऊं नवाजा जावेला। वे भपंग बजावण री कला रो 20 देशां मांय दरसाव कर र भारत री कला अर संस्कृति ने अंतरराष्ट्रीय स्तर माथे नुवी पिछाण दिलायी। संगीत नाटक अकादमी भारत रत्न ऊं नवाजी ज्या उस्ताद बिस्मिल्लाह खां रा मान मांय 40 साल री उम्र ताई रा नौजवान कलाकारां सारू साल 2006 मांय ई पुरस्कार री सरुआत कीनी ही। ई ईनाम रा तैत 25 हजार रुपया नकद, एक पट्टिका अर अंगवस्त्रम दियो जावे है।

000

प्रदेश मांय जनता री परेशानियां बेगी दूर करण रा मकसद ऊं न्यारी-न्यारी ठोडां अहलकार जनसुणवाई कर रह्या है। नीमकाथाना मांय राख्थी ज्यी जनसुणवाई मांय आला अहलकार जनता री समस्यावां सुणी अर कुछ रो मौके ई निपटारो कीनो। जैसलमेर मांय राख्थी ज्यी जनसुणवाई मांय जिला कलेक्टर प्रताप सिंह जनता री समस्यावां सुणी अर अहलकारां ने वां रा बेगा निपटारा रा हुकम दीना। बालोतरा मांय राख्थी ज्यी जनसुणवाई मांय बिजली-पाणी अर दूजां मुद्दा ऊं जुड़्या 59 मामला आया। जिला कलेक्टर सुशील कुमार यादव एक-एक शिकायत सुण र अहलकारां ने जरूरी हुकम दीना। करौली मांय राख्थी ज्यी जनसुणवाई मांय जिला कलेक्टर नीलाभ सक्सेना अहलकारां ने जनता री शिकायतां रा बेगा निपटारा री व्यवस्था करावण रा हुकम दीना। बाड़मेर मांय जिला कलेक्टर टीना डाबी 140 शिकायतां री सुणवाई कीनी। चित्तौड़गढ़ मांय जिला कलेक्टर आलोक रंजन गैर कानूनी कब्जा हटावण, पट्टा, साफ-सफाई अर बिजली-पाणी समेत न्यारा-न्यारा मामला मांय 40 शिकायतां री सुणवाई कीनी। झालावाड़ मांय जिला कलेक्टर अजय सिंह राठौड़ अर केकड़ी मांय जिला कलेक्टर श्वेता चौहान जनसुणवाई कीनी। ई बीचे प्रदेश मांय आवता महीना लगायी जावण वाळी चौथी राष्ट्रीय लोक अदालत री जाणकारी देवण रा मकसद ऊं आज डीग रा लाला मनोहर लाल खंडेलवाल राजकीय बालिका उच्च माध्यमिक विद्यालय मांय विधिक शिविर लगायी ज्यो। पैनल रा वकील राजेंद्र शर्मा बतायो के ई दौरान विद्यार्थियां ने बाल यौन उत्पीड़न, बाल तस्करी अर बाल श्रम रा विधिक प्रावधानां रा बारा मांय विगतवार जाणकारी दीरीजी। दूजी कानी लोक अदालत री तारीख 14 दिसंबर ऊं बदल र 22 दिसंबर कर दीरीजी है। चित्तौड़गढ़ जिला विधिक सेवा प्राधिकरण रा सचिव सुनील कुमार गोयल आ जाणकारी दीनी।

000

विज्ञान अर प्रौद्योगिकी मंत्री डॉ. जितेन्द्र सिंह आज नई दिल्ली मांय छात्र नवाचार अर आउटरीच नेटवर्क विजन सारु विकसित भारत पहल री सरुआत कीनी। इण रो मकसद वंचित बच्चां मांय शिक्षा, कौशल विकास अर नवाचार ने बधावो देवणो है। वे बतायो के ओ पोर्टल दूर-दराज रा हलकां रा लोगां सारु मार्गदर्शन अर प्रशिक्षण ताई पूगण सारु प्रवेश द्वार रो काम कर सके है।

000

केन्द्रीय जलशक्ति राज्यमंत्री डॉ. राजभूषण चौधरी आज जैसलमेर जिला रा गांवाई हलकां रो दौरा कर र जल जीवन मिशन रा तैत कराया जा रह्या कामां रो जायजो लीनो। वे फतेहगढ़ पंचायत समिति रा कोडियासर गांव मांय जल जीवन मिशन रा तैत घर-घर नळ रे जरिये पाणी पूगावण रा काम रो फायदो लेवण वाळा लोगां रा घर जा र पाणी री सप्लाई देख्यी। ई मौके वे कह्यो के केन्द्र सरकार कानी ऊं नळ रे जरिये घर-घर ताई पाणी पूगावण री योजना चलावण ऊं जनता ने घणो फायदो मिल्यो है। डॉ. चौधरी डाबला ग्राम पंचायत मांय राजीविका रा तैत स्वयं सहायता समूह री महिलावां कानी कराया जा रह्या हाथ री कारीगरी ऊं जुड़्या काम ई देख्या।

000

प्रदेश मांय पारो उतरण सागे ठंड रो असर बधबा लाग्यो है। बीती रात राज्य मांय 10 ऊं बत्ती ठोड़ां न्यूनतम तापमान 10 डिग्री सेल्सियस ऊं नीचे उतर ग्यो। मौसम केंद्र जयपुर री ओर ऊं जारी रपट रे मुजब माउंट आबू मांय रात री बगत सब ऊं कम 5 डिग्री सेल्सियस तापमान दर्ज करी ज्यो। सीकर मांय 7, सिरोही मांय 8 दशमलव 1 अर चूरु मांय रात री बगत पारो 8 दशमलव 6 डिग्री सेल्सियस नापी ज्यो। केई दूजी ठोड़ां ई रात री बगत तापमान 12 डिग्री सेल्सियस ऊं नीचे उतर ग्यो। रात सागे दिन मांय ई पारो उतर्यो है। केई ठोड़ां अधिकतम तापमान ई औसत ऊं कम दर्ज करी ज्यो। मौसम विभाग रे मुजब आवता दो-तीन दिन मांय घणखर ठोड़ां तापमान मांय कोई खास बदलाव रा आसार नी है। हालांकि प्रदेश रा उतराद हलका मांय संवारे री पोर धुंअर रेहवण रा आसार है।

000

उत्तर-पश्चिम रेलवे बीकानेर मंडल मांय सिंयाळा मांय कम तापमान रे कारण पटरियां सिकुड़बा अर कोहरा रा हालात मांय रेलों चलावण सारु खास योजना बणा रह्यो है। वरिष्ठ मंडल वाणिज्य प्रबंधक भूपेश यादव बतायो के मंडल मांय 287 मुसाफिर गाड़ियां अर 120 मालगाड़ियां मांय लोको पायलट्स ने फॉग डिवाइस दीरीजी है, जो कोहरा री बगत सिग्नल ऊं करीब 2000 मीटर पैली लोको पायलट ने जाणकारी दे देवे है। ई सागे ई रेल री पटरियां माथे रात री बगत निगराणी बधायी जावेला, ताकि ठण्ड रे कारण पटरी मांय दरार री तुरत सूचना मिल सके।

000

जयपुर रा जवाहर कला केन्द्र अर मध्यप्रदेश शासन रा संस्कृति विभाग री ओर ऊं जवाहर कला केन्द्र मांय 100वें तानसेन समारोह राख्यो जा रह्यो है। ई रा तैत काल सिंज्यां 3 ऊं 4 बज्यां ताई तानसेन रा बारा मांय संगोष्ठी व्हेला जिण मांय नामी ध्रुपद गायिका प्रो. डॉ. मधु भट्ट तैलंग, सुर बहार वादक डॉ. अश्विन दलवी अर वरिष्ठ संस्कृतिकर्मी अर कला समीक्षक डॉ. राजेश व्यास विचार बतावेला। ई पाछे सिंज्यां 6 बज्यां ऊं केन्द्र रा रंगायन सभागार मांय पं. प्रवीण अर चेताली शेविलकर वायलिन बजावेला।

000

सिरोही जिला रा शिवगंज मांय आज विकसित भारत/2047 मल्टीमीडिया प्रदर्शनी सरू व्ही। दो दिन री ई प्रदर्शनी रो उद्घाटन जिला प्रमुख अर्जुन राम पुरोहित कीनो। ई मौके सरकार री जनता रा भला री न्यारी-न्यारी योजनावां री जाणकारी दीरीजी अर योजनावां ऊं जुड्या फोटूआं री प्रदर्शनी लगायी ज्यी।